

安

雅

堂

稿

安雅堂稿卷之十七

華亭陳子龍臥子著

書牘

上張中丞論禦賊事宜書

乙亥春三月

伏惟閣下以方叔召虎之才當明天子左右之寄出  
鎮舊京作牧揚土值狂寇南窺淮西不靖而閣下親  
總元戎出臨江外使賊氛阻遏瞻顧不前凡三吳之  
民士安於室農安于野無犬吠之警皆閣下之明賜  
也子龍海濱之鄙儒無一長之可錄而閣下過採所

及弊拭踰情嘗自悚然莫必所效方今麾旌在郊躬  
擐甲胃而子龍又不能率良家之子結奇材之客効  
命旗鼓之前退而自思生平所習書傳所記保疆弭  
盜之方叅之當今地形時勢誠有合者故敢獻其區  
區之說惟閣下有以採擇焉方流寇之在廬鳳也勢  
逼江介然以閣下之威名長江之天險雖江南之婦  
人孺子皆知其不能南渡也今寇雖稍遠大衆在豫  
然豫之村屯小邑皆已殘破其名城大都皆已設備  
其勢不能多掠而西北勁兵蹶之於後雖江南之婦

人孺子皆憂其南下也而愚以爲不必憂夫我所患賊者食多兵勝耳但令賊以數十萬之衆饑困於中原挫折於官軍不得已而南下則必殘敗離散之餘爲乞活之計耳是天欲以大功授閣下也昔者  毅皇帝時流寇之南也覆沒於狼山之間議者以爲適有天幸愚以爲不然雖無大風不能復振何則彼固殘敗離散之餘也何況當時在事者皆庸夫懦將又非今日之比哉雖然事不可不豫集謀不可不豫定  朝廷以討賊之事屬諸道以守江之事專屬閣下此勝筭也愚以守江之

事在江以外者有二在江上者有二在江以內者有三  
請得而詳論之其一曰屯重兵於北岸自古稱守江者  
守之於外不守之於內南北所轄勢旣相錯事仍一體  
皖桐而下瓜儀而土地亘千里要害不過數處昔吳人  
築城於皖舒立塢於濡須而李椿亦云如欲保江則高  
郵六合瓦梁濡須巢湖北峽皆要地也以今賊勢若作  
渡江之計非西出皖城東趨維揚則中窺歷陽然以愚  
觀之維揚財賦重鎮設備已久且賊衆在西未必東犯  
若大兵逐之計必復掩皖城蓋進可扼吳之上流退可

西遁勸黃爲遷延之策若不出此必直趨歷陽以瞰金  
陵昔呂範從孫策破廬江還從橫江東渡下小丹陽而  
蘇峻之反也亦從歷陽襲姑熟韓擒虎之南也亦繇  
橫江以濟我師之取采石也先收舟師於巢湖繇此  
觀之渡江之勢未有便於歷陽者也援兵繇麻黃以  
至安慶者愚謂莫若畱之以鎮上流蓋期于控扼使  
賊易殲耳不必以趨戰爲功也又當擇道將之能者  
總江南之勁卒出鎮歷陽外控江淮水陸之衝內爲  
金陵藩蔽二地既有重兵三吳之民可高枕而無憂

也其一日集淮右之流人夫賊之周行天下而愈衆者非他從之者多也破城邑掠村落其遺民之屋廬燬矣妻子亡矣既無以自存而官又無以撫綏安戢之則其勢必至於作賊故流民者流賊之資也卽不作賊而流徙僑居其故鄉之井牧里閭不可復識事雖平定猶爲數世之患今江北殘破州縣不下十餘其民之未死於賊而無以自存者何啻數十萬若扶携東渡則懼藏奸間勢不可納又不可拒莫若速檄兩淮新撫就近早擇良吏脩治殘破州縣安插流民

不特江南無就食之憂而淮西赤子惕於慘禍保聚必嚴亾羊補牢豈非明喻此二者愚所謂設防於江以外者是也其一日分信地以結營壘夫江州而下以至於海沿江戍卒散在諸郡平時出江哨探特名而已非有聚屯一二萬人守要害也今賊在楚豫爲我吳患在楚者恐其順流而東在豫者恐其盡出淮右則莫若駐勁兵於九江池陽之間使楚賊東下則合皖桐之兵以拒之豫賊南窺則繼歷陽之甲以殲之此形勢之至便也昔虞允文之拒金人也亦語陳



康伯以駐兵江池之間若敵出上流則荆湘之軍捍  
於前江池之軍援于後若出淮西則池之軍出巢縣  
江之軍出無爲是一軍而有兩用也以勢言之政今  
日之事也至於沿江之守恐賊暗渡尤不可不密似  
宜與陪京操巡畫地而守險峻之地戍卒量減平坦  
之區防禦增設守江之兵尤宜專一如王震所云劍  
屋於江岸以居之而又置瞭望於高山明斥堠於北  
岸使先知賊出何道則舉烽集衆厚其兵力矢石火  
器隨以擊之使其進退失據何賊不殲其一曰練舟

師以任衝擊夫賊之渡江也大約掠民船以載耳非必具戰艦也水戰之法敵舟大者以小舟繞攻之敵舟小者以大舟衝盪之今江中原設黃鵬沙鐵等船雖非巨舸苟加練習亦可任用昔虞允文采石之戰以海鯨觸敵舟舟皆平沉其轉戰京口也以戈船爲不足復脩馬船爲戰艦卒賴其用此今日之急務也又敵之渡江必先據州渚以爲固而我之守江也必屯兵洲渚以爲伏今江中洲港最要害者如長楓夾荷葉洲陳家洲白鷺洲太子洲之屬皆平時水盜之

輿藪勾接外寇必繇此等莫若先行掃除屯兵戍之  
隨復團結魚業水手舟夫蘆丁多聚弓弩火器此唐  
璘守建康法也無事則與岸兵會哨以壯聲勢有事  
則出奇兵以資控扼勢既聯絡防禦自固此二者愚  
所謂設防於江上者也其一日脩兵政以壯內地夫  
明旨所諭江南民不知兵欲令鄉鎮間闐各自團  
結爲根本計至深切也但江南賦役煩重民困已極  
且風俗散薄既無暇日以脩其事又無同心以應其  
求此令雖行徒虛語耳議者又欲令薦紳富民各練

丁壯愚以爲其意雖美其法未善夫兵欲其聚者欲  
齊其步伍擊刺之法也且使兵習其將將習其兵也  
今薦紳意不悉公而富民畏於多事其肯應者鮮矣  
卽有應者所習不過十餘人一旦有事豈能合數家  
之兵而用哉今夫郡縣之額兵大都老弱居半耳若  
能試其技勇汰其無用不取市井遊惰而募鄉民之  
勇而無田者補之使廉勇之士爲之統率一去向時  
花鎗走陣之套習惟以比試步作爲主習之有嘗必  
成勁旅矣至於射者六藝之一尤君子周身之防也

苟人有長技雖遇喪亂猶可自脫何至糜爛耶且射者君子以爲藝小人以爲戲固人之所樂從事也其令郡縣約立射法凡博士弟子以及鄉之俊秀武夫小民各自爲偶而官以暇日較其勝負而賞賚之其薦紳富民之好事者令其懸金以聽能者之自取如是則郡縣常有數百人善射者也一郡一縣而嘗有數百人善射則賊必有所畏而不敢犯此無兵之名而有兵之實也其一曰嚴保甲以絕姦詭蓋聞寇之破城邑也多用間諜已奉明檄無不嚴閤但江左浮

華之地游食之徒椎埋之子散在市井雖在平時猶  
宜驅擯今一聞賊耗頓足相賀廣布流言望賊之來  
如望雨焉此等之人皆欲爲賊間諜者也今設守關  
之吏下挾持之令求異言異服之人而獲之不知爲  
賊用者豈必秦晉之劓盜楚豫之奸民哉所患更在  
土著耳誠能嚴設保甲約束戶口使郡縣之吏朝而  
坐於堂上凡十里之城萬家之郭街巷井臼如指諸  
掌奸詭之民無以自藏雖不用譏察彼非嘗之人何  
所投足哉如此則民心齊一賊無嚮導必無中變之

患矣其一日拯貧困以固根本今江南之民困極矣  
有歿于催科者有歿於縣役者有歿於饑饉者有歿  
於污吏之攘奪者有歿於豪家之橫逆者十年以來  
雖素封富室皆已蕭然至於貧困不保朝夕今愁霖  
浹旬菽麥敗爛而搗撲愈急兵事紛紜民之思亂十  
室而九寇在門庭而人心如此揆之往古未有不亂  
者前閣下有緩征宿逋之旨歡動百姓而下所奉行  
未能如法惟閣下斷然行之嚴勅屬吏禁火耗之嘗  
例絕差役之下鄉設賑饑之法行平糴之術內難不

作外寇何憂凡古之大聖賢人咨嗟告誡未嘗不以  
民心爲本而在今日獨爲迂論此愚生所不敢信也  
此三者愚所謂守於內地者也凡此七端皆儒生之  
固說非有奇論以閣下之明智誠一所以保釐南土  
者非小人之所能測而寇盜未全殄民生未全安者  
予龍不揣敢有進焉夫居節鎮之任處方岳之位當  
其無事則優游撫綏其民以奉天子當其有事則  
不能無所變通以濟緩急方今外之所急莫甚於將  
肉之所急莫甚於吏夫唐之方鎮所以兵強而食足



者其將士皆能自擇功成而請於朝命故所任必良也今雖不能以意行然主上所以任閣下者權不爲不重矣外自大將而內自方面之吏皆可一言而更置今夫將之懦敵而吏之殘民者不可謂無其人矣惟閣下詳察而斷之耳至於三吳多才之地凡謀計之士武健之徒可備幕府之用者當收而試之不宜散之在野異日事定功成閣下入掌樞密叅佐之英部曲之選皆得拂擢以自見雖佐主上東掃奴西收套亦有餘矣子龍草澤冗品冒昧獻書不勝悚

懼

上張玉筍中丞

戊寅

冬寒凝固伏惟道履安吉狂胡內侵踰燕攻趙蹂躪  
之慘幾遍河朔神京阻絕不通聲問者兩月矣凡  
在率土罔不憂憤莫知所措矧明公忠孝性成匡濟  
宿抱又當連師之任有保釐之責枕戈投袂更何待  
言自當糾合義旅尅日渡江以紓君父之急然以愚  
計之宜先購灰士或從海道或從山右入都探問使  
聲息稍通則人心自安訖言可息且可爲進兵緩惡

之計至於江東根本之計尤不可不爲之深慮也夫  
江東王業所興之地而財賦之藪也又不幸有富  
饒之名故有備則能稱雄於天下而爲國家不拔  
之基無備則爲芳餌而足以動姦人之欲今以方千  
里之地環江海之間困於厚賦疲於重役不知幾年  
矣又加之以師旅因之以饑饉民之未忍爲亂者以  
祖宗休養生息之恩及明公撫綏嗷育之德耳然  
今者虜騎日南流言四起寇氣東下烽火殷江內則  
薄暮探丸劫人於市攘臂偶語覘覘富室在在見告

夫小盜爲大盜之招內寇爲外寇之導早則鞭箠使之而有餘遲則干戈取之而不足其勢然也天下之事當其未然而圖之則有不信之患當其已成而爲之則有不及之憂今三尺之童莫不知其亂形而幸於變之未作所謂七年之病求三年之艾此其時也况明公以明世之英濟時之器適當其會哉子龍受知深厚不敢默默同於衆人謹疏四端以塵清晏極知庸陋庶幾土壤之益焉一曰脩吏治夫設官分職以爲民也今之爲吏者催科聽訟猶曰不得已焉至

於不情之應酬非時之期會皆可已而不已計其一日之間勞形疲神而問其用心於地方者蓋亦寡矣非不肯用心而勢有所不能時有所不暇也月廢一日之功則所積已多而况當日不暇給之時乎今江左十郡之間所當脩備興革者料明公皆洞然於中而尤莫若冷郡縣各疏其急務討論既定次第行之以觀厥成必期寔可以捍災禦變息亂安民而無取於文具至於詞訟之可省者交際之可減者皆當痛爲裁抑以展餘功明公康濟爲懷身先率下凡司道

州郡孰敢不遵必不以簿書叅謁妨損功實也二曰  
察民情今江南之亂萌果安在哉奸民倡之於前而  
饑民隨之於後也今之洵洵而語難者率惡少年耳  
非饑民也若冬無雨雪則饑民之患乃在明年四五  
月間苟旣無重罰以遏奸民又無積儲以惠饑民則  
亂成而不可解矣今須法在必行凡遇城市鄉鎮結  
黨焚掠者立誅無赦而令郡縣脩立常平廣儲米穀  
彼小民見倉廩盈溢方且安意幸慰奈何從奸宄而  
試法哉王文成公之救荒也曰饑民必救亂民必斬

夫惟饑民之必救也是故亂民可得而斬矣此恩威所以相濟也至於脩治堤堰鑿浚塘濠假貸牛種招集流移使明年歲事有成雖驅之不亂尤爲治本之計三曰設守禦愚觀寇起以來江北諸邑皆以有備而存無備而敗大概可覩見今江南郡縣類皆有城然濠之深廣者鮮矣濠不能深廣而有羊馬城砲臺者尤絕少矣城外有高崗大阜麗譙浮屠可以內瞰城中者往往見矣至於樓櫓箭簾鈎鎗巨斧之屬爲守城之具者皆當豫備火藥則多蓄之井泉則多鑿

之蓋行於無事之日則可以精詳而漸舉精詳則器足用漸舉則民不擾何至卒然有變而四顧無所恃哉四曰蓄武勇夫材幹膽力不擇地而生謂吳人柔靡者非也閩閩能用其民抗衡上國孫武審兵勢爲權家之祖其後桓元子稱北府兵可用北府卽今潤州也唐討叛藩每用宣潤弩手至我高皇帝應天順人不可以嘗情論然所以西摧勁漢北討強胡率皆吳人也孰謂吳人不可用哉蓋磊落非常之士固不可多得至於勇悍善射或任俠負氣不爲鄉曲所



容混於耕釣之中者皆當收而置之幕府不特可資  
群策亦以陰消亂萌至於防亂必當增兵增兵必當  
益餉餉既不可得則莫若汰老弱而揀精銳以所汰  
之餉厚所留之兵令郡縣正官延募教師躬親訓練  
必期一可當十又或以暇日懸金購射如李抱真之  
於澤潞種世衡之於青澗自然人漸習兵家有捍禦  
至沿海衛所邇年抽調一空鋒銳銷耗皆當特命強  
敏文職比試世弁選練軍餘使爲內地之援又三吳  
澤國陸戰十三水戰十七今方時紬不能分置二軍

仲謀諸將所云上岸殺賊洗足下船固知水陸可兼  
矣脩戰艦習舟師誠當今之急務也此四事者皆明  
公已經舉行條教諄切而沿習既久人無遠猷事關  
錢穀尚爾奉承一係地方未免掛壁此皆工於身謀  
何嘗一爲民計卽有賢者反笑爲迂今欲振衰舉廢  
必須綜核名實凡事盡力何憂不成近者又聞流人  
意窺江表至有二三爲群僞託商販或附漕艘潛蹤  
東渡者若此問果真則譏察非嘗增置尉候亦不可  
緩昔有唐涇原之變韓晉公在江左築城積粟脩立

壁塢耀兵江上運米入關 先朝也先盜邊 朝廷  
復以周文襄巡撫舊京內戢黎元外資輓運此卽蕭  
何寇恂之功也今明公任寄同於昔人進則有戮力  
共殄之勲退則有保境固圉之責狂瞽之言無當萬  
一聊自負於九九之見或不以人廢耳前承專使賜  
以水利全書經緯條悉區畫精審水學復興民免昏  
墊皆明賜也徐相國農書繕錄呈覽治水明農同源  
共貫欲求強兵必先治賦如其書足傳爰命下客裒  
潤梓行之何如

再上張中丞

戊寅

前審閣下出鎮潤州耀兵江外遠震寇志內消亂萌  
衽席三吳民受其賜至於勵兵入衛我武奮揚旣已  
氣馳伊吾之北而廟筭以根本爲憂抑而未許今  
聞逆奴破濟南蹂躪魯雲亭玉簡乃染胡塵洙泗講  
壇翻施龍帳觀其狼豕之意乃欲綴我援師於南而  
陰圖射天之計逆謀詭志其機甚深今勁兵北首固  
屬鞭長而靖綏南服實非早計恐春水未生河淮清  
淺未可恃也夫兵有形有聲形欲藏之於不見聲欲

示之以先知江南兵力止及固圉而奪人之聲在於  
進討計虜中嚮導多是北人未測東吳虛實重以閤  
下威名遠播九域所欽此時躬提勁旅佇節京江多  
其旗幟詭以更番號稱數萬聲言尅日濟師雖大兵  
止於境上而流傳遠近一則寢狂虜南牧之心一則  
壯兩淮後繼之氣所謂以進爲退以攻爲守以虛爲  
實亦權家之所尚也閣下沉幾先物妙畧通神格天  
之助綽然度內豈伊愚蒙敢叅末議特以閣下虛懷  
茹納葑菲不遺而子龍受知極深故忘其鄙賤屢塵

清覽今有一事上係 朝廷之命脉下關江左之安危敢佐箸籌以俟採擇夫度支所給半仰東南之漕而汶濟之間胡馬充斥今自江以南漕艘鱗集有司以速兌爲安漕規以儼催爲事若依限而北竟齎盜糧如稍緩交兌各畱地方萬一邀 天之靈狡奴速遁廟堂必以擔誤漕期見責郡縣方今主計之臣但守規局不識變通止顧一己之苟安不審天下之大計每每然也且漕船四五千便有漕卒五六萬所過之地鷄犬不遺甚至劫盜縱橫莫敢誰何若久畱內

地甚足生變其勢如此安可但如每年嘗例而不爲之區處乎以愚計之唐自開元中裴耀卿建武牢維口諸倉以便節級轉運劉晏之在江淮凡揚州河陰渭口在在設倉通運宋人之漕於汴也亦立轉般倉於真揚楚泗諸州 昭代之於淮安臨德通津在在設倉者非獨以節勞逸便支運亦以防意外之變如河淤路梗之類也今爲有司之計惟有速行交兌以免地方騷擾之虞而閣下宜與漕撫朱公商推安頓漕米之策一而具題一而便宜從事令各衛弁或於

瓜洲或於廣陵借定官倉民房若月內北信不減便  
應收歛而泊空艘于江南其諸漕卒或量畱守倉而  
散其餘歸衛或統以大將屯之要地以爲兩淮聲援  
行糧卽是軍需衛弁便爲將率俟虜勢小退晝夜備  
行亦守財弭亂之一道也若以起剝不便恐滋侵漁  
耗折則繫泊江中旣患於風浪卽尾內地又懼生他  
虞莫若豫於常鎮地面擇一空曠容蓄之區如孟贖  
之類聚諸漕艘檣督糧道親自彈壓畧行軍中之法  
使漕卒不得無故離伍則內地可以安枕而運道一



通飛輓如故苟捨攘未定則此米仍在江南尤爲至  
便之計也又聞虜在山東土人從之者甚衆卽虜退  
之後咽喉綰轂時時可慮遠觀元季大爲寒心雖  
聖明御宇無煩過憂而臣子忠猷何妨深計如海運  
故道若王敬所潘冲庵諸公之說亦宜預爲講求或  
有可用之時其功非細閣下忠貞天植匡濟淵深凡  
屬網繆久已經慮子龍不勝杞憂累冒尊嚴

與陳眉公徵君

去冬冰雪之會悄然北征而先生惠顧慇懃弘以錫

類每懷不遑隨念明德留滯京邑塵埃紛馳俄焉半載未能飛尺書於谷口乞片言於松門懷人望古徒託晨風而遡流光也兩獲南問知道體達和旋膺勿藥之喜夫霄客冲霧而子房稱病西聖寂虛而維摩問疾固知事關形器不係神明參苓雖非上藥恐亦高齡所宜聞先生概却湯散專意養靜是雖至道淵微不妨稍資艸木以相引輔也子龍受質隘劣文質無底辱在先生裁量之內弊嘆彌縫十有二載雖施甘饒土難望滋榮而託羽翰飛分其迅疾茲者幸採

九品之評將爲百石之吏政宜策其驚下以遂繇來  
而私心惶惑竊有所請夫抱獨往之志者在於守道  
弘命世之規者在於濟物二者小大必有攸分故嚴  
正自持每易亢折宏通廣運必藉委蛇然亢折者一  
往而共量其心委蛇者多方而始全其妙故直躬而  
逢難徒有令名曲濟而無成更貽世笑繇是觀之自  
非知幾達權之士不敢解繩墨而擅神化也子龍奉  
教大賢自持約束而未嘗學問神宇躁淺旣挾穉生  
踈誕之性而又懷元禮是非之心蹈世末流必嬰多

咎意欲思周任之戒守老氏之言退棲衡門永焉閑  
稼雖無當高趣而實協鄙懷先生追庶之資語默中  
道審時量才其必有以教鄙人矣夙昔知己書不盡  
意

與鄭超宗

丁丑

遘閔疾作比至廣陵遂至委頓一身眇然非足下挾  
醫見治且不測渡江來十五六日舊苦始盡然別病  
纏綿今不得佳也去年在京口三日見風土極開美  
又敞勁可居足下移居果否謝幼度間居無爲以垂

綸爲事頗稱北固山下大有鱸魚一出手得四十九枚彼江左英物猶寄懷此等何論吾輩腐人終當避之前足下許我十月過徵君山中何遼然也弟爾在艸土惟讀書差不減餘無足言顧冲庵司馬貴郡人在遼左有功名其集可得否其後人方顯貴足下必能致之

上吳鹿友少司馬

子龍之得奉教於左右也實在癸酉之冬以僕遨無知之人而執事進而與言終日不倦此孔氏之善誘

士元之拔十所以長養人材而濫及於下賤者也然  
私心輒自喜以爲受知於當世大賢君子雖好爵之  
榮不足過焉嗣後執事出鎮太原秉鉞雁門北拒大  
虜西守黃河中清劇盜三晉之民出水火而安井曰  
者皆大賜也而晉之薦紳先生訖於氓隸謠頌盈途  
雖鄭人之歌于產周人之慕召公何以加茲近聞執  
事自緝節南還頗堅東山之志然而聖心之眷注  
不可不酬海內之想望不可不慰恐非執事高枕之  
日也 天心厭亂 明主求治皆至懇矣自非天下

英俊何能戡定禍亂以臻太平非執事其誰任哉愚  
觀方今之患不在虜寇而在民怨其上自古未有挾  
怨民而得濟者也而主兵司計之臣皆偷安一切以  
塞責無一念及于生民者所在旱蝗赤地千里而因  
糧溢地多無名之求掘山鑄幣聚不逞之輩幾何而  
不驅之亂哉至於善治國者必使國體嘗尊而後紀  
綱可立自正朝廷以至於御四夷莫不繇此也惟名  
與器不可假人國體一失不能復振賤妨貴小加大  
夷狄乘中國賈生所謂方今之勢猶如倒懸而大臣

欲冀旦夕之安以出於必不然之下策此何說也夫  
明主可與忠言而執事又主上所最信重故凡有  
識者莫不願執事馳傳 陛見先以結人心尊國體  
爲主上言之然後退而收覽豪傑克詰戎兵以執  
事之才而虚心延問天下之士孰不願爲執事用者  
因以盪滌潢池網繆九塞于是爲主上分邪正之  
界息玄黃之爭顯忠遂良黜幽屏媚使主上之名  
過於唐虞而執事之業光於皐稷豈不偉哉子龍賤  
士也又伏處苦塊之中不宜聞天下事然觀范希文



奉諱而以萬言書于宰執乃知古人之好進其言如此也今予龍之欲獻於執事者非獨萬言之可盡而趙君言旋甚迫故畧述其概耿耿之愚何時罄之

與吳恭順國華

丁丑

結駟上都得侍言讌愛顧之隆有踰懷來至若歷杯酒之從容商文史之委曲涼颺抗發明月忽傾當是之時雖援筆於臨淄之館分席於季倫之座不是過也君侯學以性成縱體高妙經緯被於朝右音徽永於世家思慮所餘留情柔翰遂已凌躐睨代方駕

前脩豈非天然超越雖有晨風其能競疾耶子龍嘗  
謂前周後漢同號郅隆不獨政教威儀飾其光盛亦  
繇周公吉甫之章楊馬班張之作足以叙鴻模輝懿  
烈耳 國家休德暢於姬劉嘉隆以前代有卓爾之  
彥嗣是而後非不斐然無闕大雅矣子龍不揣雖在  
短褐之中妄思盛業謂當有寄亦嘗廣出谷之求效  
采風之聽天下雖大而薦紳艸莽聯鑣擊轂不過數  
人數人之中氣雄志大超然黨輩者惟我同郡李生  
雯耳李生姿稟卓犖剛峻自命及其綴辭造筆則矧

若雲霞駿若龍驤天矯明逸實殊衆觀至於抵掌世  
事竹素所列便可欣然斯真大邦之彥三吳之良也  
而生世不偶尚稱經生父仕將作爲時所構七載戍  
邊今李生以 朝廷方施祝網之仁棄瑕錄瑜遂懷  
篋書策蹇衛詣 北闕下上書 天子欲代守一亭  
障奮身匈奴爲父贖讐未知 天子能憐而許之否  
然其志亦可悲矣夫士不貴千金之璧萬鍾之位而  
貴一事之援一言之重此季布之當困危虞翻之稱  
知己也君侯貴則上公才爲世望所謂聲非加疾其

勢使然能一托布衣之交爰示提挈之旨使通邑大  
都知有李生其人乎若其辭章瑰麗九牧所希諒君  
侯自當虛客右以待之也子龍獲罪於天自出都  
門慈幃見背摧輿之物視息無知然猶欲勉自奮厲  
羅百氏之見聞繼兩京之歌頌秣陵近在江左網獵  
較易金臺遠隔幽朔徵實爲難君侯與聞國政家有  
賜書凡列聖之憲章諸曹之掌故山川風物之異  
街談巷說之餘若有存焉幸爲投寄其或志存濟澤  
道慶風雲陋此紛紛滋其鏤刻此則君侯之壯思非

鄙人之涯分也新詩一冊聊塵几席亦猶魚目之托  
隋珠願彼分光忘形其醜矣伏惟垂亮不宣

荅萬年少

自甲之春訖丁之冬中間千有餘日雖山川間之干  
戈繼作然涉河梁以抒懷望雲龍而不見每當遙夕  
未嘗不明月欲墮也流入作孽淮西榛梗屬聞足下  
遭太夫人之戚欲將一介而群慊噉噓如使絕域遂  
使古義墜廢至今罪戾極深便應斥絕而足下尚推  
夙昔遠使輒辭告哀總帳荷鄙人之薄而君子之厚

也春夏僕僕京輦趨走朝貴之門俯仰輿臺之側生平意氣不勝搖落奉諱以來愁疾交侵昔時風流何可再問弟年已及立足下又稍過之嗟竹素之難期望丹砂之可學能不愴然耶足下姿制朗逸才情雄麗孔嘉之樂其事多端至於朝吟繁欽之詩夕誦相如之賦鳴琴在堂風人所慕矣又聞遠宗伯鸞卜居吳市使後世繼士衡吳趨之篇者增此勝流何其盛歟

荅方密之

京輦逐逐南風多警未得便郵杼其情慄自莫州聞  
訃奔逝之餘病幾委篤抵廬之後哀痛小定卽從李  
子問足下近狀李子云密之近有信來在金陵甚豪  
頓躍馬飲酒壯士滿座。或引紅粧曼歌長嘯殊自快  
也。因出足下詩文二編讀之。我因謂李子曰密之良  
苦非能全其天者我於詩文知之君不見千里之馬  
平方其在山澤嚙水艸悠然自適也。然其心未嘗不  
欲備法駕而鳴和鸞者不然胡爲長鳴哉。密之名家  
盛年多才負氣又當世亂不能爲。人主建一奇立

一策故不禁其言之類激而恢蕩也足下與李子孫  
子周子輩皆落落惟弟幸通籍末初意欲上書言事  
稍發其生平之見而繞入初夏告密紛紛清流之禍  
幾在吾黨弟之不肖亦爲異論所指一二有譏告弟  
以爲子上書而不指政地不破黨論則爲卮言若言  
之是挑邪說而以子爲東南遊說也子不足惜而憂  
且在世道以此左瞻右顧終至隱忍同郡李子徐子  
輩貽書未嘗不以庸人達官相誡嗟乎弟雖有不得  
已而實繇懦怯豈敢辭良朋之責哉天下悠悠安往



而不得庸人達官此段何堪爲他人道惟與足下一  
言欲足下知我心耳一涉人事文史荒蕪邸中吟咏  
僅成百章旣無沉鬱之思又鮮明逸之致孤唱寡酬  
增其搖落矣近者治喪甫畢頗欲事此而送迎筆札  
時時見奪又李子持尺劔上書北闕下去矣惟得一  
宋生朝夕差自礪切驚其少年剛銳弟有師老財匱  
之憂恐難爲敵也

答歸德侯朝宗

吳梁遠隔淮甸榛梗而使者遐征冬春跋涉垂卹深

至循念如結曠遠以來日月迅邁嘗思輝馳引領晨  
風忽蒙誨命情采交溢展側披省神暢志馳特擢節  
之言罔遵涯分使翰墨徒費玄鑑失炤耳當今時值  
中天運非百六而長蛇薦食飛蛾弄兵嘗使志士終  
夜結憤良以衣冠之子鴆毒稱年若同養物卽有清  
整自持風烈可論者都於世事不復關懷雕繪蛾眉  
以媚俗儒而已此猶執土牛以祈應龍之澤欲求苑  
茂焉可得耶又有位脂韋阿上所好託於綜核無解  
纖苛雖塵坱之微不復能量度外至使調元酌化之

地如百石小吏繩刀筆較斗筭易稱負乘詩咏縫裳  
良有以也 主上神謀淵斷遠符 聖祖渙號布令  
欲希非嘗而庸人之論紛然在前保殘守缺便於因  
循雖有騷擾何所展其駿足耶徒使觸望風雲者瞻  
天衢而鬱陶也足下氣雄年妙漢朝門閭不下揚袁  
厚積資學尊主庇民豈曰越在艸莽乎曹生有云肉  
食者鄙耳有述之寄立言爲末今之鏤刻又不足爲  
言然而採珍敷藻古哲所重何則嘉謨偉行頓文而  
寫文之淋漓足以動激斯亦匡世宏道之助也中州

神輿之委奧氣際和淑英人毅士代有接踵今足下  
鸞峙舊梁景從之羽瀾林殷谷矣吳下僻在海隅然  
自孫氏立國以來文獻日盛秀偉相承光於中夏近  
之繼嚮頗多斐然吳郡鄮州均有俊士然吳郡軌宗  
惇實意主楷模鄮州追希英邁志存扶濟雖在同幹  
不無異枝昔人論穎汝之優劣未知何屬也州里諸  
賢足下所稱譽或太過又東帛久遲多在岑寂無以  
發揚其意然亦一時之偶矣某之踈僊僅守閭窬雖  
與徐葛同學恐是州從事才耳足下不我遇棄幸以

教之此處尚有孝廉宋徵璧字尚木善兵畧諸生宋徵輿字轅文工詩歌足下可識之歷覽諸咏雄健渾深復見正始韵語奉懷并舊稿陳政自附陳王好人譏彈之意足下定我善道也

與吳駿公太史

足下有子房之神幾備巨源之冲素入芝苑踐玉田輔導聖儲叅從講幄此八表所拭目豈特故人望金莖而鳬藻哉有道之長肇於此日足下必有陋桓蕭之淺學追閎散之良規以報主上者非草蓐所

知也倚伏消長紛然靡定鄉邦烈焰雖已小却而端  
揆無改絃之心臺諫少埋輪之氣徵兵及於禁旅措  
餉至於鬻爵使聖人懷日昃之勞而群情酣酒無  
異曩時殊可深嘆足下恢博沉潛濟用之功非異人  
任前於茂苑史席畧涉緒論所以斟酌緩急千里之  
外鄙見亦有同者未知究作何等也自仲冬附書長  
樂後體旣疲病又經營松楸無俄頃暇新年稍得嬾  
媛文史間依蘿植藥之致一往彌深惟思擅工緇素  
以附知夜之鵠而擬議無復條貫足下宿探玉笈方

抽金匱其有以教之李舒章來 京師足下與一傾  
倒否宋轅文近造益精麗以詩相投存感遇之旨幸  
獎成之

與楊機部太史

景陵歸得足下見唁之札方在凝寒增其悽慟先曾  
遣信附長樂當必得達耶足下操度剛暢資識淹遠  
以之拂拭瓊條從容 鶴禁其於光潤弘益良多召  
佚之勲海內瞻 至於推賢舉類輝我鴛鴦豈特吳  
朝之有顧薛抑亦虞世之見禹臯而衡軸之人翻以

爲諱夫世風浸薄廉耻無聞旣忘老馬之爲駒又持  
腐鼠而嚇鳳豈介山數畝反旌競爵之田而巨源百  
函更有黨同之罰居高者若此何以厲末俗挽頽風  
哉一士之進未必治一人之阻未期亂特主上側  
席思賢搜巖獎讓而具瞻之地商販爲心良爲於悒  
足下其益展忠愛廣進規猷使天下知廉讓之臣有  
光聖世范宣之化風行紳偃其功巨矣子龍艸土  
輕微煩寃日久不識宏深猶願與高賢相勗也推痛  
來都不復展卷近成韵語一章無緣相見聊當問訊



耳臨書惟有惆悵

與楊機部太史

戊寅冬

虜馬縱橫普天同僥當事者束手無策而足下激昂  
論事慷慨請纓未出國門而已氣馳狼望之北弗  
謂秦無人也自古多難之時必有忠誠俊偉之臣奮  
身以當其鋒義動天地勲在日月方今舍足下吾誰  
歸哉特時之所以相處者有感焉夫趙文肅之于庚  
戌徐文定之于己未或以本官奉使或兼臺職開闔  
若奪鳳池而改馬曹恐非所以鼓舞豪傑也在足下

以身許國東西南北何所不可但當益展忠猷永  
播丕烈以上慰明主下濟蒼生弟所引先朝故  
事者以勸善求忠當如是耳弟艸土碌碌學業不進  
未知何時得効執鞭之役分橫草之助旣念君父  
又愧友朋可勝悵悵吳人沈孟少遊塞上言兵事媿  
媿前都門頗承佳士之目今走干戈中求通幕下  
弟壯其志而爲之先容亦可備諮問之列幸善遇之  
小詩寄懷聊當鐃吹耳

上元輔周相公書

辛巳夏

伏惟閣下以保衡之才處弼亮之位光輔上聖調  
順三光雖詩書所稱何以加焉茲者主上以海內  
多事非非常之人一德之佐不足以贊中興之業虛  
已以待閣下之至詔下之日凡薦紳大夫罔不懽  
欣率舞以爲太平可翹足而望子龍至愚極賤幸辱  
爲閣下鄉里之士而閣下方弘姬公吐握之風勤武  
鄉衆思之集子龍安敢自棄不獻一言於掌記乎今  
天下東北有拊背扼吭之虜中原有跨州連郡之寇  
如在漏舟焚屋之中此收攬英雄驅策智勇之時非

優游坐觀之日也格君之功救時之務從容造膝之際閣下必有忠言至計爲明主盡言之此非草茅下士所知子龍請言天下之大勢以俟採擇當今之最急者首在山東次在荆襄國家都燕二百餘年矣寄命於東南之轉輸齊魯盜起漕運路斷則咽喉絕有坐困之虞此如治病者必先使其能食而後可徐爲之計他疾不然則立斃之道也勝國之末不愛侯王之爵招盜賊以通海道僅得數年之安乃今日之勢則又大異元之轉漕止以漕輸京師供六宮百

官之費尚無邊陲之飛輓也今津門之運一日不繼則關寧枵腹又何暇他論哉故今日之計當竭力以先清山東山東事體與楚豫不同其民饑寒所迫起而爲盜非作惡已盈誓不返顧之賊也及今勦撫並行早爲收拾尚可戡定山東旣平則血脈流通元首有盤石之安人心有所恃矣昔唐都長安仰賴江淮之米運道險遠更甚於今興元中方鎮阻命道路榛梗韓滉在江南運糧餉軍每艘置弩手以爲防援有寇則叩舷相警比至渭橋盜不敢近時關中米貴賴

以減價今之漕艘亦應仿其遺意約束卒伍使與所  
經地方協力守護以保無虞此亦當今之要務也自  
古荆襄爲天下重者地當要害人多雄武西通秦蜀  
北控中原東南爲江左之上游也今聞賊已破襄其  
勢必不肯坐守一城將有所出不北渡漢以窺中原  
則南攻荆以逞東下夫賊之徘徊江漢之間者三四  
年矣其心未嘗一日忘中原也有廣漠長江以爲防  
故不得已而爲走蜀之計今取襄之後卽據樊城此  
其意將北聯陝維之賊東引蕲黃之寇自此以往皆

平曠之區將縱橫馳突而莫之能禦此廟堂之所當留意也又聞獻賊在穀城時卽思造船爲東下計此時雖得襄陽軍資恐數萬之賊食必不贍中原饑亂之後百里無烟賊若求食勢必窺荆窺荆則武漢震而東南動搖古者荆襄分裂之時東南嘗守荆以拒襄彼敵國猶然况盜賊群居無終日之計者乎今當擇智勇重臣坐鎮荊州專責以規復襄陽襄陽一日不復偽賊據爲巢穴則江漢之險賊得有之彼可進可退可南可北無不如意矣此皆書生揣度之言

自知其無當而敢陳於閣下之前者知閣下方宏海  
嶽之收不敢自棄其流壤也抑子龍更有請焉治國  
之要在於得人心得人心之術在於從天下之望善  
人者天下之望而國家之元氣也竊見漳浦黃少詹  
清足範俗學能通微嘗自以爲處盛世事 聖君危  
言無諱以干 主上赫斯之怒今多受榜掠微聞連  
引頗衆恐海內清流善士不免重足而立非細故也  
夫人主之德如天豈宜與匹夫爭是非故漢高晉武  
尚能救周昌劉毅今少詹之慙直未至至二千而



主上之聖豈止度越兩主况又有閣下臯夔之佐在  
側乎晏相國祁大夫之舉海內顓顓惟閣下是望側  
聞閣下上念主德下惜人才咨嗟嘆息以爲聖  
政之惡務此萬世瞻仰之舉子龍雖爲少詹門下士  
道義至篤然不敢以感激之言上涸左右知閣下保  
全善類之心出於至公無所用其私言也